



Broj: 07-40-730/13  
Ilijaš: 11.04.2013.g.

**PRAVILNIK  
O KRITERIJIMA, NAČINU I POSTUPKU RASPODJELE SREDSTAVA IZ  
TEKUĆEG GRANTA ZA PROGRAME IZ OBLASTI KULTURE KOJI SE  
FINANSIRAJU I SUFINANSIRAJU SREDSTVIMA BUDŽETA OPĆINE  
ILIJAS**

\*\*\*\*\*

Uj. 126. ilijaške brigade br. 6. 71380 Ilijaš  
Tel. ++387 33 580-620, 580-690; fax 400-505,  
Transakcijski račun kod VAKUFSKE BANKE,d.d. Sarajevo:1602000000710845  
e-mail [drustvenedjelatnosti@ilijas.ba](mailto:drustvenedjelatnosti@ilijas.ba) | [info@ilijas.ba](mailto:info@ilijas.ba)



Broj certifikata: CR14625

Na osnovu člana 8. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj 49/06), člana 23. i 107. Statuta Općine Ilijaš-prečišćeni tekst ("Službene novine Kantona Sarajevo", broj 20/09) Općinski načelnik donosi:

## **PRAVILNIK O KRITERIJIMA, NAČINU I POSTUPKU RASPODJELE SREDSTAVA IZ TEKUĆEG GRANTA ZA PROGRAME IZ OBLASTI KULTURE KOJI SE FINANSIRAJU I SUFINANSIRAJU SREDSTVIMA BUDŽETA OPĆINE ILIJAŠ**

### **POGLAVLJE I – OPĆE ODREDBE**

#### **Član 1. (Predmet Pravilnika)**

Ovim Pravilnikom utvrđuju se kriteriji, način i postupak raspodjele budžetskih sredstava Općine Ilijaš iz tekućeg granta za programe iz oblasti kulture, način doznačavanja sredstava i nadzor nad utroškom sredstava od strane udruženja.

#### **Član 2. (Aplikanti)**

(1) Sredstva iz Člana 1. ovog Pravilnika dodjeljuju se udruženjima iz oblasti kulture, isključivo na osnovu programa koji se provode u Interesu I na području općine Ilijaš.

(2) Sva udruženja iz oblasti kulture koja imaju namjeru aplicirati za dodjelu sredstava potrebno je da ispunjavaju sljedeće uslove:

- da je nosilac projekta, odnosno podnosilac aplikacije organizovan u skladu sa pozitivnim zakonskim propisima najmanje 12 (dvanaest) mjeseci prije objave Javnog poziva, te da blagovremeno izvršava obaveze u skladu sa članom 33. Zakona o udruženjima i fondacijama ("Službene novine Federacije BiH", broj: 45/02),
- da ima sjedište na području općine Ilijaš,
- da je zahtjev podnio Upravni odbor ili Predsjedništvo udruženja,
- da ima obezbjeđene tehničke uvjete za realizaciju programskih aktivnosti,
- da ima dokazanu sposobnost za realiziranje aktivnosti iz oblasti kulture,
- da ima usvojen Program rada za tekuću godinu,
- da ima finansijski plan za tekuću godinu,
- da ima finansijski izvještaj za predhodnu godinu sa Bilansom stanja i Bilansom uspjeha ovjeren od AFIPA do 28. februara tekuće godine,
- da je ispoljena racionalnost u korištenju ranije dodijeljenih sredstava i da su budžetska sredstva uredno i na vrijeme pravdana.

### **POGLAVLJE II – JAVNI POZIV**

#### **Član 3. (Javni poziv)**

(1) Sredstva se dodjeljuju na osnovu prijave po Javnom pozivu koji objavljuje Općinski načelnik putem Službe za društvene djelatnosti općine Ilijaš.

(2) Javni poziv za raspodjelu sredstava iz Člana 1. ovog Pravilnika objavljuje se na oglasnoj ploči općine Ilijaš, zvaničnoj web stranici općine i putem Radio Ilijaša, najkasnije 30 dana od dana usvajanja Budžeta Općine Ilijaš.

(3) Javni poziv za raspodjelu sredstava traje 15 dana od dana objavljivanja u sredstvima Informisanja.

(4) Prioritetne oblasti za programe bit će navedene u Javnom pozivu.

#### **Član 4. (Komisija za odabir programa)**

(1) Odabir programa za finansiranje sredstvima budžeta Općine Ilijaš vrši Komisija za kulturu i

sport Općinskog vijeća Ilijaš na osnovi kriterija za ocjenjivanje iz poglavlja IV ovog Pravilnika.  
(2) Ukoliko je član Komisije istovremeno i član Udruženja koje je apliciralo za dodjelu sredstava, taj član Komisije se neće izjašnjavati kod razmatranja aplikacije Udruženja čiji je član.

(3) Stručne i administrativno - tehničke poslove za potrebe Komisije obavljat će Služba za društvene djelatnosti.

(4) U radu Komisije, bez prava izjašnjavanja, mogu učestvovati stručna lica iz oblasti u koju projekat spada.

### **POGLAVLJE III: PRIJAVA ZA JAVNI POZIV**

#### **Član 5. (Prijava)**

(1) Subjekti iz člana 2. ovog Pravilnika podnose prijavu Komisiji na objavljeni javni poziv.

(2) Prijava treba sadržavati:

- popunjen prijavni obrazac,
- rješenje o registraciji (ovjerena kopija),
- uvjerenje o poreznoj registraciji (ovjerena kopija),
- uvjerenje o izmirenim poreskim obavezama,
- transakcijski račun (ovjerena kopija ugovora s bankom ili potvrda banke),
- popunjen obrazac programa kojim udruženje/fondacija aplicira za dodjelu sredstava, s jasnom definicijom problema koji adresiramo ili oblasti intervencije, programskih ciljeva, ciljne grupe, broja učesnika, očekivanim direktnim i krajnjim rezultatima, konkretnim aktivnostima programa koje će biti poduzete, ukupnim troškom realizacije programa i izvorima finansiranja, vremenskim planom provođenja aktivnosti, te na koji način će aplikant informisati javnost o aktivnostima realizacije programa,
- bilans stanja i uspjeha za proteklu godinu, ovjeren od AFIPA do 28. februara tekuće godine(ovjerena kopija),
- tekstualni i finansijski izvještaj za udruženja koja su dobila finansijsku podršku iz Budžeta općine Ilijaš u prethodnoj godini,
- za programe koji se provode u školama dostaviti pisanu saglasnost direktora škole, odnosno nadležnog ministarstva.

(3) Aplikant može tražiti ukupan iznos vrijednosti programa ili dio nedostajućih sredstava, što je dužan naznačiti u zahtjevu.

(4) Aplikant može aplicirati neograničenim brojem programa, te može biti podržano više njegovih programa.

(5) Ukoliko aplikant kojem su dodijeljena sredstva po javnom pozivu za prethodnu godinu nije dostavio izvještaj iz člana 13. ovog Pravilnika ne može učestvovati u raspodjeli sredstava za tekuću godinu.

#### **Član 6. (Prijavni obrazac)**

Prijavni obrazac podnosi ovlašteno lice aplikanta i sadrži:

- naziv programa,
- puni naziv aplikanta (sjedište, adresa, telefon/faks i e-mail),
- oblik, datum, broj i mjesto registracije,
- broj transakcijskog računa,
- ime i prezime odgovorne osobe za provođenje programa i njene kontakte,
- kratak opis aplikanta (npr. misija, vizija i područje djelovanja),
- oblast na koju se odnosi program i opis konkretnog problema koji se rješava provođenjem programa,
- iznos cijelog programa i udio koji se traži iz budžeta Općine Ilijaš,
- ostalo (dodatne informacije o programu, partnerima i budućim aktivnostima).

**Član 7.**  
**(Informacije za aplikante)**

Uputstvo za aplikante, kriteriji i prijava programa za finansiranje sredstvima iz budžeta Općine Ilijaš, bit će objavljeni na web-stranici općine Ilijaš i dostupni na info-punktu općine Ilijaš.

Prijave s dokumentacijom podnose se Službi za društvene djelatnosti s naznakom „Komisija za kulturu i sport: dodjela grantova za programe iz oblasti kulture“, s navedenom adresom, lično ili poštom.

U uputstvu će biti naveden rok za podnošenje zahtjeva.

**POGLAVLJE IV: KRITERIJI ZA OCJENJIVANJE**

**Član 8.**  
**(Kriteriji)**

(1) Općinski načelnik vrši odabir programa na osnovi prijedloga Komisije iz Člana 4. ovog Pravilnika koji je sačinjen u skladu sa sljedećim kriterijima:

a) Posebni kriteriji

R.b.	POSEBNI KRITERIJI	Težinski faktor	Bodovi
<b>1</b>	<b>Nacin finansiranja programa</b>	<b>20</b>	
<b>2</b>	<b>Kulturna promidžba općine, kantona, države</b>	<b>20</b>	
<b>3</b>	<b>Tradicionalnost programa</b>	<b>20</b>	
<b>4</b>	<b>Doprinos razvoju kulture na području općine</b>	<b>15</b>	
<b>5</b>	<b>Broj mladih uključenih u oblast kulturno-umjetničkog amaterizma</b>	<b>15</b>	
<b>6</b>	<b>Unaprijeđenje i razvoj kulturne baštine</b>	<b>10</b>	
	<b>Ukupno:</b>	<b>100</b>	
<b>1</b>	<b>Nacin finansiranja programa</b>	<b>20</b>	
	Program nema druge izvore finansiranja		0
	Program ima obezbjedjeno finansiranje do 30%		2
	Program ima obezbjedjeno finansiranje do 50%		3
	Program ima obezbjedjeno finansiranje do 80%		5
<b>2</b>	<b>Kulturna promidžba općine, kantona, države</b>	<b>20</b>	
	Program ne doprinosi kulturnoj promidžbi općine		0
	Program doprinosi promociji općine Ilijaš u zemlji		3
	Program doprinosi promociji općine Ilijaš u inostranstvu		5
<b>3</b>	<b>Tradicionalnost programa</b>	<b>20</b>	
	Program ima tradiciju dužu od 20 godina		5
	Program ima tradiciju dužu od 15 godina		4
	Program ima tradiciju dužu od 10 godina		3
	Program ima tradiciju dužu od 5 godina		2
	Program ima tradiciju do 5 godina		0

<b>4</b>	<b>Doprinos razvoju kulture na području općine</b>	<b>15</b>	
	Program se odnosi na sve kategorije građana općine		5
	Program se odnosi na kategoriju školske omladine		3
	Program se odnosi na kategoriju predškolske djece		2
<b>5</b>	<b>Broj mladih uključenih u oblast kulturno-umjetničkog amaterizma</b>	<b>15</b>	
	Od 150 do 200 mladih		5
	Od 100 do 150 mladih		4
	Od 50 do 100 mladih		3
	Od 10 do 50 mladih		2
	Od 5 do 10 mladih		1
	Do 5 mladih		0
<b>6</b>	<b>Unaprijeđenje i razvoj kulturne baštine</b>	<b>10</b>	
	Program doprinosi unaprijeđenju i razvoju kulturne baštine		5
	Program ne doprinosi unaprijeđenju i razvoju kulturne baštine		0

#### b) Pozitivni kriteriji

- da se program odnosi na sve kategorije građana općine Ilijaš i da će se provesti na njenom području;
- da je ispoštovana procedura za pisanje programa;
- da je jasno definisana ciljna grupa i da obuhvaća veći broj korisnika usluga s jednakom kvalitetom isporuke;
- da su očekivani rezultati mjerljivi, realni i ostvarivi;
- da angažuje ili ima kao ciljnu grupu marginalizirane grupe (npr., osobe s onesposobljenjem, Rome, nacionalne manjine, socijalno ugrožene grupe itd.)
- da je budžet realan i u skladu s aktivnostima.

#### c) Eliminatorski kriteriji

- program nije dostavljen u naznačenom roku;
- nedostaju formalni uvjeti za kandidovanje programa (nepotpuna ili netačna dokumentacija);
- nije opravdan utrošak sredstava za ranije odobrene programe (nije dostavljen finansijski i narativni izvještaj o provođenju ranije odobrenih programa);
- da program ne angažira kvalitetno osoblje, članstvo ili volontere za njegovo provođenje;
- sve aktivnosti se događaju van općine Ilijaš;
- prijavni obrazac nije popunjen u potpunosti;
- programom se podržava rad političke stranke;
- nedostaju ključne informacije o programu;
- udruženje iz oblasti kulture nije na općinskom popisu udruženja.

**Član 9.**  
(Ocjena programa)

- (1) Ukupan broj bodova na osnovi posebnih kriterija dobija se kao zbir dobivenih proizvoda težinskog faktora svakog pojedinačnog kriterija i odgovarajućeg broja bodova za taj kriterij.
- (2) Za ocjenu programa na osnovi pozitivnih kriterija koristi se skala od 1 do 5 bodova za svaki od kriterija. Svaki član Komisije dodjeljuje bodove za svaki od pozitivnih kriterija pojedinačno. Ukupan broj bodova na osnovi pozitivnih kriterija predstavlja zbir bodova svih članova Komisije.
- (3) Ukoliko se članovi ne usaglase oko nekog od eliminatornih kriterija, konačna odluka se donosi na osnovi većine glasova svih članova Komisije.
- (4) Konačna ocjena za svaki program, koji zadovoljava eliminatorne kriterije, dobije se zbrajanjem bodova ostvarenih na osnovi posebnih i pozitivnih kriterija.
- (5) Komisija konačnu ocjenu svakog programa vrši na obrascu za Komisiju koji je sastavni dio ovog Pravilnika.

**Član 10.**  
(Obrazac za Komisiju)

Obrazac za Komisiju sadrži:

- a) naznaku podržava li se program u cijelosti ili samo jedan njegov dio;
- b) ocjenu programa na osnovi ocjenjivanja po kriterijima iz Člana 9. ovog Pravilnika koju popunjavaju članovi Komisije;
- c) naznaku da se program odbija (u slučaju da nisu ispunjeni kriteriji);
- d) rubriku s obrazloženjem odbijanja programa (u slučaju odbijanja);
- e) rubriku Ostalo za dodatna mišljenja i obrazloženja vezana za program (od važnosti za Komisiju), a čije vrjednovanje nije propisano u kriterijima;
- f) potpise predsjednika i svih članova Komisije.

**Član 11.**  
(Odluka o raspodjeli sredstava)

- (1) Komisija donosi prijedlog odluke o raspodjeli sredstava rukovodeći se ocjenom programa na osnovi kriterija propisanih u Članu 8. ovog Pravilnika. U slučaju da dva ili više programa dobiju isti broj bodova, a raspoloživa sredstva nisu dovoljna za njihovo finansiranje, Komisija većinom glasova vrši odabir programa za finansiranje.
- (2) Komisija je dužna pripremiti prijedlog odluke o raspodjeli sredstava i dostaviti je općinskom načelniku u roku od 15 dana od dana isteka roka javnog poziva za prijavu projekata.
- (3) odluku o raspodjeli sredstava iz stava (2) ovog člana općinski načelnik će objaviti na službenoj web-stranici i oglasnoj ploči Općine Ilijaš i dostaviti je putem Komisije u pisanom obliku svakom aplikantu pojedinačno.
- (4) Odlukom o raspodjeli sredstava definišu se prava, obaveze i odgovornosti korisnika sredstava, način praćenja provođenja odobrenog programa, način praćenja namjenskog trošenja sredstava, te elementi narativnog i finansijskog izvještavanja o provođenju programa.

**POGLAVLJE VI: ZAVRŠNE ODREDBE**

**Član 12.**  
(Ravnopravnost spolova)

Odredbe ovog Pravilnika odnose se podjednako na lica muškog i ženskog spola, bez obzira na rod imenice upotrebljen u tekstu Pravilnika.

**Član 13.**  
(Stupanje na snagu)

Ovaj Pravilnik stupa na snagu narednog dana od dana donošenja.

Član 14.

Stupanjem na snagu ovog Pravilnika prestaje da važi Pravilnik o kriterijima, načinu i postupku raspodjele sredstava iz tekućeg granta za projekte iz oblasti kulture koji se finansiraju i sufinansiraju sredstvima Budžeta Općine Ilijaš broj: 01/2-40-2349/11 od 15.06.2011. godine

Broj: 07-40-730/13  
Ilijaš, 11.04.2013. godine



Načelnik općine

Akif Fazlić dipl.ecc.

